

FARANDULA

Hildward Croes cu produccion na Spaño

ORANJESTAD(AAN)- E hoben musico Arubano Hildward e aña aki tin plannan grandi pa locual ta trata musica.

Recientemente Hildward Croes a firma un contrato cu Sonografica pa 3 aña y tur aña manera acorda mester sali un lp ariba mercado.

Como prome lp cu a ser lanza ta ALU ALE cu tin ariba dje 10 cancion na Spaño traduci for di cancionnan mas gusta na Papiamentu.

E idea pa lanza un lp na Spaño ariba mercado a bini cu entre otro ayudo di Angela Scarlata cu a trece Hildward den contacto cu Sonografica. Despues e contactonan a sigui y a traha varios luna ariba e traduccion di e canticanan pa despues graba un demo aki na Aruba y mande Venezuela.

Ayanan mesora el a ser gusta y solamente mester a haci algun areglonan y ta keda cla. E traduccion segun Hildward a dura poco ya cu mester a cambia full e estilo pa e palabranan cay bon na Spaño y nan a haya un gran ayudo pa esaki cerca sr. Minguel Monaco cu ta residencia aki na Aruba.

Ariba lado A di e lp tin entre otro Dos pasos, Iremos Tu y Yo, Soy Feliz, Tongolele y Welele y na lado B tin Aloloco, Mamela, Paraíso del Caribe, La Culpas es Tuya, y La Canción. E cantantenan ta Sasha Figueroa y Chicho Kock y a ser acompaña pa algun integrantenan di Time, como coro Kenneth Samson, Ronald Brete y Walter de Cuba y ariba trombon dos Venezolano.

Diseño di e capa mes a ser haci pa e propio Sonografica, mientras cu e fotonan tabata di Marjorie Vermeer, maquillha a ser haci pa sra. Sita Roos y trahenan di Beach Bum Co.

Hildward a conta DIARIO cu e disco tabata cla desde Augustus aña pasa pero na Venezuela nan kier a introduci prome e tipo, kadans y nan a lanza un lp por estilo ariba mercado pa despues bini cu esun di dje. ALU ALE ta e prome lp tipo kadans na Spaño ariba e mercado Latino Americano.

Segun Hildward na



Venezuela e aceptacion na Sonografica tabata fantastico, y nan ta contento cu e proyecto. Tur cos ta depende awor di e

aceptacion di e publico, tanto akinan como na paisnan Latino Americano.

Basando ariba un otro topico

Hildward a bisa DIARIO cu e plannan cu e tin pa e aña aki ta basta. Un proyecto cu e tabata trahando ariba dje ta entre otro

pa un LP di Inky Laurens. E materialnan tur e tin cu el a haya for di sr. Eddy Bennett (q.e.p.d.) y e tabata kier pa Hildward traha ariba nan pa pone nan ariba un LP y pa e ser canta pa Inky Laurens. Hildward a bisa cu sigur sigur e lo bay traha ariba nan y e lp lo ser dedica na e gran maestro aki.

Otro plan cu Hildward tin ta un lp di Musical Time na nivel local, un lp di Chicho Kock, y un followup di Long Roy.

Si tur e plannan aki keda cla, Hildward a bisa e tin pensa tambe di bini cu un lp di su nies, al estilo di pianomusic cu musicanan local y na fin di aña un lp di pasco cu Madelyne Croes.

Di Time, Hildward a bisa cu nan tin pensa di viaha pa Calle 8, pa New York pa presenta ayanan cu The New York band, tambe pa e carnaval di Sint Maarten nan lo tey y si e disco ALU ALE haya acogida Time lo haci algun presentacionnan na Caracas.

Sonografica e aña aki, segun Hildward tin pensa di banda Time pa representa nan na e Festival di Caribe na Cartagena.

Di parti di DIARIO ta desea Hildward tur clase di exito y cu e logra tur su plannan pa e aña aki.

Segundo Festival di Jazz cu 15 artista di fama Internacional

ORANJESTAD(AAN)- Comision organizador di Aruba Jazz & Latin Music Festival 1989, a yega na un programa definitivo di artistanan cu lo presenta durante e segundo festival aki. E programa aki ta resultado di hopi contacto cu representantenan di varios artista mundialmente conoci.

Pa e prome fin di siman di Juni lo presenta: Diabierna Juni 2

Jonathan Butler, David Sanborn, kende Diarazon ultimo a gana un premio Grammy den categoria di musica Jazz, Ruben Blades, kende tabata nomina pa un premio Grammy recientemente.

Diasabra Juni 3 lo tin Bob James, Lee Ritenour y Wilfrido Vargas. Diadomingo Juni 4: Edwin Abath y un all star band, Celia Cruz y Johnny Pacheco. Diabierna dia 9 di Juni Dianne

Reeves (segun e revista "Billboard", e tres top-artistanan di musica Jazz pa 1988), Diane Schuur y Wynton Marsalis.

Dia 10 di Juni lo actua Najee y George Benson.

Y Diadomingo Juni 11 Ferrari, Wilkins, e conocido cantante cu a cosecha hopi exito cu su cancionnan den e pelicula "Salsa" y cu proximamente lo saca su lp. nobo, Jose

Feliciano, kende su concierto aña pasa tabata sumamente exitos.

E comision organizador tabata tin contacto cu un gran cantidad di artistanan renombra, entre otro e famoso Kenny G. Sinembargo Kenny G. no por a kibra su compromiso cu "The Bee Gees", cu kendenan e tin un tour rond Europa, durante e mesun temporada.